

Izveštaj sa 34. sjednice Općinskog vijeća Ilijaš

29. oktobra u velikoj sali Općine Ilijaš održana je 34. sjednica Općinskog vijeća. Zasjedanje je vodio Dopredsjedavajući Općinskog vijeća g. Mahir Dević, a pored vijećnika, općinskog načelnika, pomoćnika općinskog načelnika, predstavnika mjesnih zajednica, sjednici su prisustvovala i zastupnica Predstavničkog doma Parlamenta FBiH g. Almira Čosić, Direktorica Agencije za ravnopravnost spolova u BiH g. Samra Hadžović-Filipović, stručna savjetnica u Agenciji za ravnopravnost spolova u BiH g. Kika Babić-Svetlin, predstavnica Nevladine organizacije "ANDANTE SEE" g. Adela Hadžiomerović te predstavnici vijeća učenika Srednjoškolskog centra "Nedžad Ibrišimović" Ilijaš. Na Dnevnom redu se našlo 16 tačaka a svakao jedna od najznačajnijih tačaka današnje sjednice je usvajanje izmjena i dopuna Budžeta Općine Ilijaš za 2015. godinu. Naime, Općinsko vijeće Ilijaš je na svojoj 25. sjednici, održanoj dana 30.12.2014. godine donijelo Budžet Općine Ilijaš za 2015. godinu sa planiranim prihodima i rashodima u iznosu od 8.978.400,00 KM, te na svojoj 32. sjednici održanoj dana 14.07.2015. godine donijelo Izmjene i dopune Budžeta Općine Ilijaš za 2015. godinu sa planiranim prihodima i rashodima u iznosu od 9.906.200,00 KM. Izmjenama i dopunama Budžeta Općine Ilijaš za 2015. godinu utvrđeni su ukupni prihodi i primici u iznosu od **10.631.900,00** KM, što u odnosu na aktuelni plan predstavlja povećanje za 725.700,00 KM odnosno za 7% više u odnosu na aktuelni Plan Budžeta za 2015. godinu. Shodno povećanju prihoda i primitaka prijedlogom Izmjena i dopuna Budžeta povećani su rashodi i izdaci kako bi budžet bio uravnotežen. Vijećnici su jednoglasno podržali Izmjene i dopune Budžeta uz konstataciju da je ovo do sada najveći Budžet Općine Ilijaš. Vijećnici su primili i informaciju o izvršenju Budžeta Općine Ilijaš za period 01.01.-30.09.2015. godine prema kojoj je Budžet općine Ilijaš u navedenom periodu bilježi 6.456.595,00 KM ostvarenih prihoda, što je 65% od planiranih prihoda u Budžetu za 2015. godinu. Sa druge strane, ostvareni su izdaci u iznosu od 5.990.898,00 KM, što predstavlja 60% od planiranih izdataka u Budžetu za 2015. godinu. Prema tome, ostvaren je suficit za navedeni period u iznosu od 465.697,00 KM.

Jednoglasno su usvojene i Odluke o zonama sanitarne zaštite i zaštitnim mjerama za izvorišta: "Vrutak", "Petnjik", "Tuk", "Javor" i "Korita", kojim se utvrđuju granice zona sanitarne zaštite, zaštitne mjere, izvori i način finansiranja zaštitnih mjera za navedena izvorišta. Odluke su donosene u cilju zaštite pitkih podzemnih voda koje se planiraju koristiti za potrebe vodosnabdijevanja šireg područja Gajeva, Nišićke visoravni i MZ Dragoradi od svih vidova zagađenja i štetnih uticaja koji mogu nepovoljno djelovati na zdravstvenu ispravnost vode za piće ili na izdašnost izvorišta.

Na osmoj tački dnevnog reda našao se Prijedlog Odluke o usvajanju "Lokalnog akcionog plana za provedbu UN Rezolucije 1325 u Općini Ilijaš za period 2016-2017. godine".

Nevladina organizacija "ANDANTE SEE" u saradnji sa Agencijom za ravnopravnost spolova BiH, Ministarstva za ljudska prava i izbjeglice BiH, provodi projekat „Ravnopravnost spolova – put ka ostvarivanju ljudske sigurnosti“, koji se zasniva na Akcionom planu za implementaciju UN Rezolucije 1325 - Žene, mir i sigurnost u Bosni i Hercegovini.

Prema riječima direktorice za ravnopravnost spolova u BiH, g. Hadžić-Filipović: "Glavni cilj lokalnih akcionih planova je postizanje veće sigurnosti lokalnih zajednica sa aspekta ravnopravnosti spolova. To podrazumijeva učešće većeg broja žena na mjestima odlučivanja, jačanje kapaciteta predstavnika/ca organa lokalne samouprave, lokalnih institucija i policijskih struktura radi postizanja veće sigurnosti žena, muškaraca, djevojčica i dječaka od svih oblika zastrašivanja, nasilja, neravnopravnog tretmana i diskriminacije sa kojima se svakodnevno susreću".

Prije izrade Lokalnog akcionog plana za provedbu UN Rezolucije 1325 (LAP UNR 1325) u Općini Ilijaš za period 2016-2017. godine urađena je analiza postojećeg stanja, odnosno analiza stanja sigurnosti sa aspekta ravnopravnosti spolova i mapiranje potreba u općini

Ilijaš (Baseline studija) na osnovu koje su definisani ciljevi i aktivnosti akcionog plana. Analiza je pokazala nepostojanje kapaciteta za izradu lokalnih politika koje se odnose na pitanja sigurnosti građana i građanki, pogotovo uzimajući u obzir različite potrebe žena i muškaraca.

Ovaj akcioni plan treba da doprinese povećanju nivoa sigurnosti lokalne zajednice odnosno unaprijeđenju sigurnosti građanki i građana u lokalnoj zajednici kroz poštivanje i primjenu domaćih i međunarodnih standarda za ravnopravnost spolova.

Na današnjoj sjednici potrebnu većinu glasova dobile su i Odluke o načinu i uslovima prodaje neizgrađenog građevinskog zemljišta u obuhvatu Industrijske zone "Luka" i na lokalitetu "Banovac".

Općinsko vijeće Ilijaš je na redovnoj 33.sjednici, održanoj 29.septembra 2015.godine usvojilo Odluku o izmjenama i dopunama Pravilnika o stipendiranju i nagrađivanju izuzetno nadarenih učenika i studenata kojom su studenti Univerziteta u Sarajevu iz grupacije tehničkih, biotehničkih i medicinskih nauka stavljeni u povoljniji položaj u pogledu ostvarenog prosjeka ocjena iz prethodne akademske godine u odnosu na studente drugih naučnih grupacija. Tom intervencijom iz prava na ostvarivanje općinske stipendije izostavljeni su studenti iz grupacije tehničkih, biotehničkih i medicinskih nauka ostalih Univerziteta u Bosni i Hercegovini. Nastojeći da se ispravi napravljena greška prije objave općinskog Konkursa za stipendiranje, Općinskom vijeću Ilijaš predložena je Odluka o izmjenama i dopunama Pravilnika o stipendiranju i nagrađivanju izuzetno nadarenih učenika i studenata, kojom pravo na stipendiranje ostvaruju i studenti drugih Univerziteta u Bosni i Hercegovini i to fakulteta iz grupacije tehničkih, biotehničkih i medicinskih nauka, uz uslov da imaju ostvareni prosjek ocjena iz prethodne akademske godine 7,50, te je Odluka o izmjenama i dopunama Pravilnika o stipendiranju i nagrađivanju izuzetno nadarenih učenika i studenata jednoglasno podržana.

Općinsko vijeće je donijelo saglasnost na izmjenu namjene lokaliteta kojim je planirana sportska ploha (košarkaško igralište) u namjenu za potrebe izgradnje parking prostora, na lokalitetu Banovac, a u obuhvatu Regulacionog plana Banovac.

Informacija o uspjehu i odgoju učenika u osnovnim i srednjim školama, na području Općine Ilijaš u školskoj 2014/2015. prema kojoj je u protekloj školskoj 2014/2015. godini u Osnovnim školama "Hašim Spahić" u Ilijašu, "Stari Ilijaš" u Starom Ilijašu, "Podlugovi" u Podlugovima i "Srednje" u Srednjem kao javnim ustanovama, nastavu je pohađalo ukupno 1879 učenika što je više za 7 učenika u odnosu na školsku 2013/2014. godinu kada je ukupan broj učenika bio 1872. Realizovan je planirani fond nastavnih sati kao i ostali nastavni sadržaji predviđeni nastavnim planom i programom, koji su zacrtani Godišnjim programom rada škola za 2014/2015. godinu, a realizovani su i drugi oblici odgojno-obrazovnog rada škola.

U Srednjoškolskom centru "Nedžad Ibrišimović" realizovan je cjelokupan fond časova opće obrazovne, stručno-teorijske, izborne i praktične nastave kako je i planirano za školsku 2014./2015.godinu. U toku godine organizovana je dopunska nastava iz predmeta gdje su učenici pokazivali slabije rezultate. Organizovana je i dodatna fakultativna i instruktivna nastava kao i niz sekcija, klubova i udruženja za vannastavne aktivnosti. Planirane nabavke u oblasti opremanja kabineta i školske zgrade u potpunosti su realizovane. Nastavu u školskoj 2014/2015. godini pohađalo je 428 učenika koji su bili raspoređeni u 19 odjeljenja.